

Laskee lehmiä ja uutisia taitheen näyttelyhallista
"Tullee olheen kukkia lehmitten vanhoissa vesikupissa"

YLIKUKKOLA

Luova puntipariskunta Åsa ja Per Pesula antava nyt uutisen tulevan pyhäsaian lehmän- ja vasikanlaskemisesta Ylikukkolassa.

– Meän vanhaasta navetasta tulee näyttelyhalli valokuvanäyttelylle "Maa, jonka hään peri", sanoo perijä itte – Per Pesula.

Maanpruukaripariskunta Per ja Åsa Pesulan lehmänlaskeminen Ylikukkolassa vieköttellee jonku vuen takkaa nuin tuhanen ihmistä suuren navetan aijale. Nuin 80 lehmää ja nuorukaista ja 20-30 vasikkaa laskethaan tänä vuona vaphaasti nykhiin laitumille.

Tapahtumaa isonethiin menheenä vuona puntimarkkinaksi, ko talonpaikan puoji tarjosi Tornionlaakson ja itäsen Norrbottenin paikalisia tuotheita.

Tulevanna pyhäsaikana, 27.-28. toukokuuta, oon taasen laskemisen aika eikä Pesulan pariskunta ole laiskutellu uusien aatosten hoksauksien puolela.

Taitheen näyttelyhalli

Vanhaasheen navethaan auasthaan, nähkääs, taitteenhalli "Navetta" näythään valokuvanäyttelyä "Maa, jonka hään peri" ja sen hommaava Anders Alm ja Marianne Söderberg.

– Näyttelyä oon aikasemmin näytetty Norrbottenin ja Västerbottenin museoissa, Åsa Pesula selittää talonpaikan naamakirjasivula.

Kuluvan viikon aikana Åsa oon sen lisäksi ollu täyessä vauhtissa luomassa omanlaista lehmänkantturaa ja se oon jo

saanu aikhaan arvailuja kotisivula: ”Åsan isoformaattinen kissa, sisäsiittonen aasi vai vanhaa hännätön maitopänikkä...”

Äijitaakis ja helppoheikkiä

Valokuvanäyttelyn krunni oon aikasemmin julkastu kirja kolmen polven Pesuloista, jotka oon hoitanheet talonpaikkaa Pesulas Lantbruk. Joku vuosi aikaa Pesulan pariskunta alko tekheen rypsiöljyä kans.

Kotisivula luvathan kans ”äijitaakista” molempinna päivinä ja ”paljon konheita” eri firmoista plus ”kaikkia muita helppoheikkiä, jotka myyvä kaikkia taihvaan ja maan välistä” ruokaa, slöitikäsiyötä ja paljon muuta.

Myötähommaavanna tässä mainos-suunatussa tapahtumassa oon kans Norrmejerier.

– Laitumille laskeminen antaa norlantialisile lissää tietoa siitä mistä maito tullee ja miksi elävän Norlannin vaaliminen oon tärkeätä. Se lissää tietoa miksi oon tärkeätä valita 100 prosenttia norlantilaista meijerihyllyltä, selittää Johanna Cory, joka projektijohtaa eri paikkakuntien laitumille laskemista. Avisi-ilmotuksessa se ilmottaa, ette hään hoitaa 20. laitumelle laskemisen sisältöä. Menheenä vuona tuli suunile 20.000 kattojaa eri laitumille laskemishiin. Kesikävijä oon 35 – ikänen vaimonpuoli – ja sen följiyssä oon keskimäärin 2,1 lasta.

FI Lehmistä ja vasikoista, joita laskethan vaphaiksi Pesula Lantbrukissa, oon menheinä vuosina tullu oikein kansanjuhla. Menheinä vuosina tuhansia kattojia oon tehny vaelusmatkoja tänne.

Meänkielennös: Bengt Pohjanen

EKALE: Lehmänlaitumista kansanjuhlaa